

21. aprili 2016

Inatsisartut aalajangiiffigisassatut siunnersuut, Naalakkersuisut peqquneqassasut neqerooru-teqartarnermut inatsimmut allannguutissanik siunnersuuteqarnissaannik, sanaartornermi suliallit nunatta pissarititaanik atuinissamik kissaateqartut tapersorsorneqarnissaat siunertaralugu.

(Inatsisartunut ilaasortat Aqqaluaq B. Egede, Inuit Ataqatigiit aamma Per Rosing-Petersen, Partii Naleraq)

Ukiorpassuannortuni nunatta pissarititai assigiinngitsut atornerulernissai politikikkut ujartorneqartarpoq, oqallisaasaqalunilu. Tamannalumi inuiaqatigiit aamma akornanni.

Ujartorneqartarportaaq nunatta tunniussinnaasai allat, assersuutigalugu sanaartornerup silarsuaani nunatta tunniussinnaasai, soorlu oqallisaarisup ukiaq 2015-imi Inatsisartut ataatsimiinneranni, Ineqi Kielsenip oqaatigigaa, sikublokitut ittut sanaartornermi misiligaataasarsimasut, aammalumi tunisassiornissaq nunatsinnilu ataavarnerusumik illuliornermi allanillu sanaartornermi atornerarunniissaannik siunertaqartoq. Allaallumi immaqa avammut tunisassiarineqalersinnaallutik. Misiligarneqartarsimapput.

Ajoraluartumilli maannamut suli annertunerusumik iluattinngittumik, tamanna qularnanngilaq assigiinngitsorpassuarnik peqquteqarpoq.

Immaqa ilaatigut inuiaqatigiit ikittuunnguulluta, nalunngilarput sanaartugassanik tunisisassiornikkut imaasiillaannaq nunarsuarmioqatittinnut unammilleraannaanata.

Taamaamat una oqallisissiaq pineqartoq pingaarutilittut Siumumiit isigaarput. Maannamummi annertunerusumik iluattinngittoq qanoq isilluta iluattissuarput?
Tamanna assigiinngitsumik akissutissaqartoq qularnanngilaq.

Inuiaqatigiit ikittunnguugatta, pissarititagit imminut akilersinnaasumik iluattissappata, ilaatigut aaqqissuussaanagerusumik pilersaarusiukkamilu ingerlanneqartariaqartoq qularnanngilaq. Tamannalumi anguniarlugu naalackersuisooqatigiit Siumut, Demokraatit Atassullu ilaatigut naalackersuisooqatigiinnissamik isumaqatigiissuminni imaattut anguniagaqarput. Issuaaneq aallartippoq:

“Sanaartornermi atortut avataaniit tikisinneqartartut annikillisinniarlugit, Nunatta pissaritaanik atorluanaanerunikkut inerisaasoqarnissaa Naalackersuisooqatigiit sulissutigissavaat.”

Issuaaneq naavoq

Qularnanngitsoq tassaavoq suliffeqarfimmik aallarniiniarneq imaannaanngitsoq, nukippassuarnik, tiimerpassuarnik, suleqatissarsiornerpassuarnik atuiffiusartoq.

Assersuutigalugu silarsuarmi suliffeqarfiit nalitunerpaartaasa ilaat, immaqa tamatta nalunngisarput “Apple”, aallarniisut ilaasa ataataata quiani (garage). Uterinneq, nutaanik isumassarsiorneq, piu-massuseqarneq iluattikkusullugu, nukippassuarnik atuineq pereermat suliaq siuariartulersimavoq.

Tamanna oqaluttuaq allarnisaasunut allarpassuarnut assiguvoq.

Nunatsinni aamma arlanisaasut arlaqartarput, tamanna nalunngilarput, ilai iluattittarput, ilai ajoraluartumik iluattittanngillat. Suliffeqarfimmik aallarnisaanerup silarsuaa taamaappoq.

Imaasiiallaannaq nunarsuarmioqatittinnut milliunilikkaanik inulinnut unammillersinnaanngitugut oqaatigaara nalunngikkipput, ilaatigut taamaammat inuiaqatigiit ikittunnguulluta suleqatigiinnissaq pisariaqarluinnarpoq, nunatta pissarititai iluattittumik atorneqassappata ataavartumik.

Assersuutigalugu pisortat sanaartortittinerisa ilaannut, pilersaarusiukkamik sanaartortoqarsinnaanerani sikublok atorlugu, sukumiisumik sulissutigineqartariqarpoq.

Assersuutigalugu, pilersaarusiukkamik ingerlassinnaappat akitigullu unammillersinnaappat soormi Qaqortumi mittarfissap illutassaa sikublokimik sananeqaruni?

Imaluunniit, akitigut unammillersinnaappat pilersaarusiornermullu naapertuuppat, soormi aatsitasarsiorniat ilai IBA aqutigalugu isumaqatigiissusiornermi illut imaluunniit illorsuit sanaartugasasa ilaat, tamaasaluunniit, sikublokimik atuigunik?

Sanaartorneq sikublokinik ataavartumik annertuumillu ingerlanneqarsinnaappat, qularnanngilaq unammillersinnaanerulissaaq sanaartorluni atortunut allanut, soorlu qisunnut avataaniit eqqusukkattinnut. Naluneqanngilarmi annertuumik tunisassiorneq, tunisassiornermi aningaasartuutit agguaqatigiisillugu apparsarsinnaammagit.

Inuiaqatigiit ikittuunnguulluta suleqatigiinnissaq pisariaqarpoq, nunatta tunniussinnaasai iluat-sittumik atorluarneqassappata, immitsinnut illersornissaq pisariaqarsinnaasarpoq, avataaniit tunisassianut unammillerniarnermi, taamaattoq aamma akitigut unammillersinnaaneq avataaneersunut aamma pingaaruteqartutut taasariaqarluni.

Taamaammat siunnersuut una Siumumiit ilalernartipparput, anguniakkamut allorianerit amerlasuujusussat ilaattut. Siunnersuutip siunertaa paasinarpoq, aqqissuussinerit taamaattut maannakkut allartittariaqarput.

Siunnersuut aappaasaaniinnginnerani, sanaartornermut ataatsimiititaliamut innersuupparput.

Qujanaq.

Jens-Erik Kirkegaard

Siumut.